

禮記通解

禮記通解卷九

郝敬習

郊特牲第十一

郊特牲卽首語命篇中雜舉禮事而明其義郊禮大故以名實不專言郊耳

郊特牲而社稷大牢天子適諸侯諸侯膳用犢諸侯適天子天子賜之禮大牢貴誠之義也故天子牲孕印弗食也祭帝弗用也大路繁纓一就先路三就次路五就郊血大饗腥三獻爛一獻孰至敬不饗味而貴氣臭也諸侯爲賓灌用鬱鬯灌用臭也大饗尚腍脩而已矣

此言大禮貴誠不貴文祭天于郊祭社稷于國特牲用一犢牛也社稷用大牢天用特者萬物皆天非盡物可報以微爲誠也天子適諸侯諸侯供膳用犢如事天也諸侯適天子天子賜之大牢如待社稷也蓋大牢盡物特犢貴誠義不在物耳凡牲小則純潔至孕則有牝牡之雜不以獻至尊大禮不用也大路天子所乘祀天之車無文飾也先路副車在大輅之前次路又在先路之前繁纓說見上篇凡禮天全爲上近乎天者次之近人又次之純人爲下血天全腥近天燂近人熟純乎人矣郊祀天大饗宗廟祫禘也三

獻祭社稷五祀也。一獻禮最小。郊與大饗重于三獻。一獻者。以至敬不饗味。貴氣臭也。諸侯爲賓。朝于天子。天子饗于廟中。使宗伯攝主。以圭瓚酌鬱鬯之酒。獻賓。貴臭之義也。詳見周禮大行人。禮器亦云。諸侯相朝。灌用鬱鬯。無籩豆之薦。卽此意。大饗饗諸侯。用牲而言暇脩者。所重在暇脩。亦不饗味之義。暇。捶肉爲段。脩。以薑桂脩和之。

大饗。君三重席而酢焉。三獻之介。君專席而酢焉。此降尊以就卑也。饗。帝有樂。而食嘗無樂。陰陽之義也。凡飲養陽氣也。凡食養陰氣也。故春禘而秋嘗。春饗孤子。秋

食者老其義一也。而食嘗無樂。飲養陽氣也。故有樂食。養陰氣也。故無聲。凡聲陽也。鼎俎奇而籩豆偶。陰陽之義也。籩豆之實。水土之品也。不敢用褻味。而貴多品。所以交於旦明之義也。賓入大門而奏肆夏。示易以敬也。卒爵而樂闋。缺孔子屢歎之。奠酬而工升歌。發德也。歌者在上。匏竹在下。貴人聲也。樂由陽來者也。禮由陰作者也。陰陽和而萬物得。旅幣無方。所以別土地之宜。而節遠邇之期也。龜爲前列。先知也。以鐘次之。以和居參之也。虎豹之皮。示服猛也。束帛加璧。往德也。

此大饗。謂諸侯相饗。諸侯之席三重。故主君亦三重。

以受客之酢爵。如諸侯使大夫來聘。大夫禮三獻。席
再重。介猶賓也。不言賓。避敵君也。專席猶單席。君避
三重之禮。單席而坐。以受客之酢。君爲主人。故降其
尊。以就客之卑也。饗飲賓也。禘祭祖也。皆酒爲主。而
用樂食饋食嘗薦新。皆食爲主。而無樂。陰陽之義者。
飲自天化爲陽。食由地產爲陰。或云六牲動物天產。
九穀植物地產。飲主牲。食主穀也。飲養陽。食養陰。故
春酒熟而禘。陽氣生也。秋物成而嘗。陰氣斂也。饗孤
子以春。孤幼方長屬陽。食耆老以秋。年齒旣衰屬陰。
其義一。而嘗與食無樂者。陽氣發舒。陰氣寂寥。凡聲

屬陽故養陰不用聲樂也。鼎以熟牲體，俎以載之一
鼎則一俎。凡設鼎俎用一三五七九之數，陽之奇也。
設籩豆用二四六八十之數，陰之偶也。籩實如菱芡
棗栗之類，豆實如芹蒲菁韭之類，水土之品也。饗味
人所常食之味，不敢以祭，盡志也。貴多品，盡物也。旦
明猶神明，詩云：昊天曰旦，昊天曰明。鄭註：旦作神。燕
賓于寢，享賓于廟，大門寢廟外門。肆夏樂章，周禮九
夏之一。卽周頌時邁之詩，易變也。易以敬，變易起敬
也。卒爵，盡飲也。酒行樂作，卒爵樂止也。孔子屢歎歎
其禮比樂也。爵不遽飲，俟樂而卒，樂不極作，盡爵而

止雖雖肅肅能進能反所以歎美之終燕非一爵故
屢歎卽後節子云射何以聽何以射之意奠酬主受
賓酢又酌勸賓曰酬賓受而奠之不舉也是時樂闋
工升堂歌以發揚賓主之美德也凡樂歌在堂上衆
音在堂下匏謂笙竹謂管貴人聲者人聲自然八音
造作也樂和故曰陽來禮肅故曰陰作卒爵而樂闋
奠酬而升歌禮樂合而陰陽和也旅幣諸侯之貢幣
旅陳也謂庭實之旅也無方謂土地各有常產道里
各有遠近非一方也龜鐘皮帛皆常貢鐘金器金聲
和居中以參之也往德王比德以玉貢是以德往也

○按饗與享通而義畧異獻上曰享以飲食獻神人曰饗上節大饗腥宗廟祫禘也比時祭四親爲大又大饗尚暇脩天子饗諸侯也比饗耆老孤子卿大夫羣臣爲大此大饗三重席諸侯自相饗也比饗鄰國來聘之卿大夫爲大又曲禮大饗不問卜祭天地也比饗小祀爲大凡祭祀宴飲大神祇大賓客皆稱大饗王制云宗廟之祭夏曰禘明堂位云季夏六月禘周公雜記云七月禘此與祭義又云春禘禘于春近是然謂禘饗與飲有樂食嘗無樂似無謂詩魯頌秋而載嘗萬舞洋洋商頌那之詩多言樂亂曰顧予烝

嘗湯孫之將是嘗亦有樂也周禮主日舉以樂侑食
論語西飯皆有樂官是食亦有樂也記言不必盡合
而鄭註改嘗爲禴孔疏推爲殷禮皆鑿也

庭燎料之百由齊桓公始也大夫之奏肆夏也由趙文

子始也朝覲大夫之私覲非禮也大夫執圭而使所以
申信也不敢私覲所以致敬也而庭實私覲句何爲乎

諸侯之庭句爲人臣者無外交不敢貳君也大夫而饗

君非禮也大夫強而君殺之義也由三桓始也天子無

客禮莫敢爲主焉君適其臣升自阼階不敢有其室也

覲禮天子不下堂而見諸侯下堂而見諸侯天子之失

禮也由夷王以下句諸侯之宮縣玄而祭以白牡擊玉
磬朱干設錫智冕而舞大武乘大路諸侯之僭禮也臺
門而旅樹反坫繡黼丹朱中衣大夫之僭禮也故天子
微諸侯僭大夫強諸侯脅於此相貴以等相覲以貨相
賂以利而天下之禮亂矣諸侯不敢祖天子大夫不敢
祖諸侯而公廟之設於私家非禮也由三桓始也天子
存二代之後猶尊賢也尊賢不過二代諸侯不臣寓公
故古者寓公不繼世君之南鄉答陽之義也臣之北面
答君也大夫之臣不稽首非尊家臣以辟君也大夫有
獻弗親君有賜不面拜爲君之答已也

此節記後世壞禮之由。庭燎庭中設炬以待早朝。庭堂下也大戴記天子百燎上公五十侯伯子男三十。今之諸侯皆用百燎。自齊桓公始。大射禮公升卽席。奏肆夏燕禮賓及庭奏肆夏。皆諸侯之禮。趙文子趙武晉大夫朝覲諸侯見天子之名。五霸強同盟來見亦稱朝覲。諸侯相朝覲大夫從行不宜以私禮覲見主君。惟奉君命出使執圭則有私覲。執圭以代君申信也。代君故可私覲。從行無私覲。所以致不二之敬於君也。從行以庭實私覲是通外交與君二矣。論語孔子私覲執圭奉使也。大夫饗君是召君飲于其家。

故曰非禮。三桓魯桓公子慶父叔牙季友也。慶父作亂。魯殺之。天子不為人客。以至尊無敢為之主也。凡君適臣由主階升。卽君為主。臣不敢私其室也。諸侯見天子曰覲。天子坐堂上。諸侯拜堂下。夷王以後始廢此禮。夷王庶王六代孫。天子之樂四面皆懸曰宮。縣諸侯三面曰軒縣。白牡凡祭祀用牡尚白者。殷王禮諸侯遵時用騂牡也。以玉為磬。以朱飾干。鏤以白金曰錫。讀如錫衰之錫。光澤也。冕舞者戴冕也。大路天子之祭車。諸侯亦有磬。有舞干。有路車。而玉磬朱干。見大路。惟天子得用之。臺門築土為臺。架屋其上。

爲門旅猶設也。樹屏也。所以蔽內外。天子外屏。諸侯內屏。大夫以簾。士以帷。玷以奠爵。几案之類。設于兩楹間。當尊之南。兩君相見。獻酬畢。反爵于其上也。繡猶刺也。白黑曰黼。丹朱丹染。繪爲朱色。中衣著于禮服內。猶今朝服之中單也。丹朱爲中衣。繡黼爲禮衣。天子弱。故諸侯僭。大夫強。故諸侯被脅。相貴以等。請以已之尊貴陵人。所謂小役大。弱役強也。諸侯有國。不敢祖天子。其廟五。以始封之君爲始祖。大夫有家。不敢祖諸侯。繼別子自爲宗。魯三家立桓公廟。是大夫祖諸侯也。二代之後。如夏殷之在周。虞夏之在殷。

唐虞之在夏皆二代猶尚也。先聖之子孫雖不盡肖，猶以先世賢尊崇之也。諸侯失國寄居人國曰寓公，以其嘗爲君，不敢臣之。其子孫則爲臣矣。故曰不繼世。蓋君者南面，臣者北面，南爲陽，北爲陰，天體北高而南臨地，地勢南下而北承天，答對也。此天地之義。寓公所以不可臣，繼世所以不得不臣也。人臣見君必稽首，大夫以上皆然，獨家臣不然者，非家臣不同爲臣，以大夫不同爲君，國爲君，家則主耳。凡大夫有獻于君，使宰致之。凡拜謝君賜，不必面君，蓋親獻必拜，與面拜賜，君必答拜，故不敢煩君也。諸侯亦臣于

人者。故于其臣拜必答。天子當不然矣。

按此節之言。如覲禮不下堂。見諸侯。諸侯不敢祖天。予大夫不敢祖諸侯。此萬世不刊之典。真先王之禮。聖人之經。而周禮以覲爲秋。見其春朝夏宗。諸侯皆客。天子出迎。豈其然乎。春秋傳謂宋祖帝乙。鄭祖厲王。魯頌僖公郊天。禘后稷。世儒遂謂諸侯大夫皆有祖王廟在都家。宗人掌之。此三桓所以歌雍舞八佾也。周禮左傳。烏足據乎。古者刑不上大夫。霸者假義。亦曰勿專殺大夫。先王建官惟賢。自無殺大臣之事。今謂大夫強。諸侯殺之。春秋所以書也。記未知春秋。

故引以爲義。左傳謂周封夏殷二王後爲上公。封黃
帝堯舜後爲三恪。凡古神明後先王皆欲存之。今謂
尊賢不過二代。何居君臣之分。等于天地。君卽位臣
拜下。分爾今云大夫之臣不稽首。是春秋以來之陪
臣。大夫有獻不親大夫拜。君必答。是春秋以來之大
夫。若云大夫避君不使家臣稽首。諸侯避天子。答臣
拜。然則天子之不答拜。與羣臣見天子稽首。可知矣。
而記不及以未及見天子盛世威儀耳。朱干設錫。魯
孔氏謂當如詩鉤膺鏤錫。揚之錫。按錫。揚也。眉上曰
揚。飾當馬額。故名。此謂以白金飾干而曰錫。無謂也。

諸侯禮衣繡刺中衣用丹朱鄭引詩云素衣朱繡改繡作綃据魯詩云素衣朱綃亦無謂也

鄉人禡夕孔子朝服立于阼存室神也孔子曰射之以樂也何以聽何以射孔子曰士使之射不能則辭以疾縣弧之義也孔子曰三日齊一日用之猶恐不敬二日伐鼓何居孔子曰繹之於庫門內祊之於東方朝市之於西方失之矣

禡當作禡單衣也卽論語所謂鄉人儺袒禡叫號驅逐疫鬼俗禮也鄭註禡爲強鬼朝服禮服阼主位鄉人禡近戲而聖人齊明盛服接之以禮鎮之以靜內

存神而不亂敬之至禮之本也室猶舍也謂神守舍也或曰安室內先祖之神射者容比禮節比樂耳聽音節射中法度至難故言何以能之上節卒爵而樂闋孔子屢歎意與此同射本男子之事士使射不能則辭以疾弧弓也內則云男子生則設弧于門左懸弧者疾不能執弓則懸之也不言不能者義不得辭也凡祭必致齊三日不聽聲樂以養敬猶恐不足一日之用今二日伐鼓奏樂將何以祭何居怪之之辭居猶在也家語云季桓子將祭齊三日而二日鐘鼓之音不絕卽指此事釋者祭之明日尋

繹昨日之禮以償尸也。繹當于廟門外。遠至庫門內。非也。庫門。魯大門。凡廟在大門內。左祊。謂始祭。祝求神于廟門之外。禮器云。爲祊乎外。祊於門東。非禮則祊於廟門西。爲禮也。西爲陰方。門外之西。賓位也。朝市。早市也。周禮市有三期。大市日側。朝市于朝夕。市于夕。日出市于西方。非禮。然則朝市當于東耳。

社。祭土而主陰氣也。君南鄉於北墉下。答陰之義也。日用甲。用日之始也。天子大社。必受霜露風雨。以達天地之氣也。是故喪國之社。屋之。不受天陽也。薄社北牖。使陰明也。社所以神地之道也。地載萬物。天垂象。取財於

地取法於天是以尊天而親地也故教民美報焉家主
中霽而國主社示本也唯爲社事畢出里唯爲社田國
人畢作唯社丘乘供粢盛所以報本反始也季春出火
爲焚也然後簡其車賦而歷其卒伍而君親誓社以習
軍旅左之右之坐之起之以觀其習變也而流示之禽
而鹽鹽諸利以觀其不犯命也求服其志不貪其得故
以戰則克以祭則受福

社土神天子以四海爲土故祭地下至庶人一廛莫
非土也故天高而尊非天子不能答地卑而親食土
之毛皆美報焉非方澤與社有二土也天子曰人社

諸侯曰國社又各有勝國之社曰亳社國社在庫門內西亳社在庫門內東祖廟之前故春秋傳曰間于兩社大夫以下百家共置一社曰里社其主或木或石有壇無屋繚以周牆祭以春秋言社不言稷稷統于社也周禮司徒五土山林川澤丘陵墳衍原隰爲五百穀生原隰而稷爲長是五土之一產耳故言社而稷在中地道主陰故曰陰氣北爲陰方故社主向北君南面負北牆祭之所以答陰也墉牆也祭用甲日甲木爲生物之首社主生物也有壇墳無屋以通天地雨露之氣喪國猶亡國周禮媒氏有勝國之社

如周所勝國則殷也故謂之亳社薄當作亳亡國之社生物之功已息故覆以屋不受天陽也屋四塞而開窻于北通陰氣也天垂象謂授以氣使效法也地承天產物故人得取財焉天如父地如母天尊地親也先王立社教民以美善報其親也故季夏土旺祀中霤屋四圍中央卽今人家天井中土位也家之中霤卽國之社萬物生于土歸于土故曰本也社事祭社之事單盡也民居爲里周禮二十五家曰里里出里謂里中同社之家盡出供事每家一人猶詩云三單無家不出也爲社田謂祭社而田獵國人畢作無

人不田也。九夫爲井，四井爲邑，四邑爲丘，四丘爲甸，甸六十四井。賦車一乘，又謂之乘米曰粢，在器曰盛。丘乘供粢，盛言無處不供也。衣食資于土，故曰本始。酬答曰報，追念曰反。三言唯社以明非社不爾也。財非土不生，人非財不養，人皆食土之毛，皆有反報之禮。月令仲春擇元日，社周禮大司馬仲春以火田，田止弊火，蟄蟲將啓，故止焚社主殺，故先田獵。講武，田則焚萊，牧師云：凡田事，贊焚萊，謂焚草萊以田也。今云：季春出火者，三月建辰，火星昏見南方，故司燿云：季春出火，民咸從之，時則正可焚耳。簡者，別其利鈍。

歷者試以險易百人爲卒五人爲伍誓社謂以軍法告衆于社左右以旗幟進止以金鼓或左或右或坐或起皆陣法之變今以田爲陣以獸爲虞以獲爲功使之學習也流示之禽謂逐禽流散示誘之鹽作鹽蠱通不堅固也小人見利易動旣誓以命又蠱以利使堅忍其志不敢貪得犯命以此習變戰必克以此獲禽奉祭格神受福矣

按宇宙間百物皆神神者百物之生氣造化之靈機祭者盡人之道以美報焉故其神皆以古人之賢者爲主如土爲句龍龍爲后稷之類非句龍本爲土后

稷本爲穀也。如鄭玄王肅輩說愈鑿而愈舛矣。人生
父天母地。仰觀天同耳。地則隨人各有。天子率土諸
侯國大夫家士庶人一廬皆土。故社親猶母。百昌生
于土。反于土。養于坤。藏于坤。致役于坤。所以唯社事
單里唯社田。畢作唯社祭。皆供。故社者民所生。衆所
聚。心力所同也。是故人主重社。稷社存君存。社亡君
亡。動衆必于社。講武必于社。誓告必于社。軍行社行。
犯命戮于社。與衆共也。人心所係莫如社。故土地人
民爲國之寶。此也。月令社以仲春。此云季春。日用甲
周書召誥用戊。不必盡合。賢者識其大者耳。

天子適四方先柴郊之祭也迎長日之至也大報天而主日也兆於南郊就陽位也掃地而祭於其質也器用陶匏以象天地之性也於郊故謂之郊牲用騂尚赤也用犢貴誠也郊之用辛也周之始郊日以至卜郊受命于祖廟作龜于稱宮尊祖親考之義也卜之日王立于澤親聽誓命受教諫之義也獻命庫門之內戒百官也大廟之命戒百姓也祭之日王皮弁以聽祭報示民嚴上也喪者不哭不敢凶服汜埽反道鄉爲田燭弗命而民聽上祭之日王被衮以象天戴冕璫漢十有二旒則天數也乘素車貴上質也旂十有二旒龍章而設日月

以象天也。天垂象，聖人則之。郊所以明天道也。帝牛不吉，以爲稷牛。帝牛必在滌三月，稷牛唯具，所以別事天神與人鬼也。萬物本乎天，人本乎祖，此所以配上帝也。郊之祭也，大報本反始也。

此節記郊祀之禮。天子適四方，謂巡守至方嶽下，未朝會而先燔柴升煙，以告至于天。此在外告天之禮也。每歲祭天，必于國外之郊，卽圓丘泰壇也。以建子之月，冬至一陽初生，日漸舒長，故曰長日之至。月令以冬至爲短至，短之極卽長之始也。陽氣始動，萬物承天迎其方來，行此大禮以報大生之德，所以必迎。

日者天爲元陽日爲諸陽之宗天無形可主以日爲主也每歲祀天非一如祈年大雩明堂之類皆是惟冬至爲重故曰大報兆域也擇地爲界域卽壇丘也南陽位必于郊者天道曠遠非可祀于葑屋之下也埽地而祭無重筵几席之設故曰質陶匏無文飾象自然也赤黃曰騂周人尚赤用犢見前篇日用辛以周人始郊冬至得辛後世因之迎冬至以後一月內所值辛日用齊戒自新之義也卜郊古人祭必卜日冬至一月三辛惟其所卜也受命于祖廟以卜郊請于祖也作龜于禰宮于親廟灼龜也祖尊故受命禰

親故作事澤澤宮將祭射于澤宮以擇士也澤宮卽璧
雖泮宮之別名禮器云魯人將有事于上帝先有事
于頴宮古習射于學故曰序者射也有司卽澤宮戒
誓百執事君亦聽之受教諫之義也自澤宮還至庫
門內有司獻戒誓之命申戒百官也太廟在庫門內
左百姓謂勲舊世家賜族姓者尊而戚故戒于太廟
百官卑而疎故戒于大門之內皮弁朝服也王致齋
必于路寢祭之日王夙興朝服以聽報而後往謂報
時早晚與事備具周禮小宗伯祭日逆粢省鑊告時
于王告備于王是也天子朝服祗侯所以嚴事上帝

也。天子嚴，臣民莫敢不嚴，故曰示也。喪不哭以下，皆謂近郊之民。汜埽猶灑埽，反道謂平治道路。鄉，郊內六鄉。民皆于田間設燭，照王早適郊也。諸事不令而民自聽，示民嚴而民皆知嚴也。袞，畫龍于衣，其狀袞然。龍乾物，象天也。璪，繅也，與藻同，以五色絲繩貫玉十二，垂冕前後爲旒也。天有十二次，故則天交龍曰旒。旒旒十二，以帛爲之。龍章日月，亦畫于旒上也。王者郊祀，配以始祖，故周郊祀以后稷配上帝，各用一牛。先三月取二牛，滌牢養之。如帝牛有他故，不可用，則取稷牛，卜以供帝，而以不用之牛供稷，取具而已。

人死爲鬼。天降爲神。神尊鬼卑。故事。天與稷別也。萬物本乎天。人本乎祖。又明稷所以配天之義。

按詩書言天多言上帝。未聞天別有主也。天謂之帝。已屬強名。又以日主天。則似日尊而帝友卑矣。日者。天七政之一。謂日至郊。其理卓然。謂郊主日而用日。至則附會耳。鄭謂三代郊用寅月。此迎長至。爲卯月。春分之日。又謂郊與園立殊。園立冬至祭昊天上帝。郊則孟春祈穀。龍見而雩。月令四時迎氣祀五帝。乃昊天上帝之佐。魯郊用子月辛日。記爲魯禮。此鄭玄諸家之說多端。而記爲近。春秋書魯郊九無常期。何

知辛本于月一歲內祭天不一而冬至爲大園丘泰壇總一兆謂有昊天上帝又有五帝則卽主矣又云主日不矛盾邪周禮大宗伯以玉作六器蒼璧禮天牲幣各倣其器色則郊牲宜蒼此用駢亦矛盾也禮大饗有常期不上魯郊上而日定于辛上吉則舉成公十七年九月辛丑用郊定公十五年五月辛亥郊哀公元年四月辛亥郊皆志僭也穀梁不知春秋謂正月至三月辛日皆可上郊記遂以用辛爲周之始郊上日爲尊親然則上不吉卽不郊豈得謂大饗乎故記言非古也郊祀衣裘周禮云祀昊天上帝服大

裘冕五帝亦如之。記乘素車。周禮謂王路錫樊纓十有二就以祀。夫乘素車猶可。被大裘則迂矣。天子被無表之裘。戴無旒之冕。乘柴車以出。不近于罪人乎。裘惟冬可用。祀五帝則夏亦有郊。亦可以裘乎。鄭又謂冕衣裳九章。始山龍。而日月星在旂常。今記言衮亦有日月星辰象天。而鄭遂推記爲魯禮。然記本謂王耳。魯豈王乎。詩云。秋而載嘗。夏而福衡。是宗廟之牲亦在滌三月。不獨郊牛。而今云帝牛在滌。稷牛惟具。又孝經云。宗祀文王于明堂。以配上帝。故我將之。頌爲明堂樂歌。是配帝不獨以祖也。今云人本乎祖。

以配上帝禮非一端難求盡同先儒云萬物本乎夫
而人本乎祖冬至祭天以祖配之冬至氣之始也萬
物成形于帝而人成形于父季秋享帝以父配之季
秋成物之時也此義得之

天子大蜡

音

八伊耆

其

氏始爲蜡

蜡也者索也歲十二

月合聚萬物而索饗之也蜡之祭也主先嗇而祭司嗇
也祭百種以報嗇也饗農及郵表畷拙禽獸仁之至義
之盡也古之君子使之必報之迎貓爲其食田鼠也迎
虎爲其食田豕也迎而祭之也祭坊房與水庸事也曰
土反其宅水歸其壑昆蟲毋作草木歸其澤皮弁素服

而祭素服以送終也葛帶榛杖喪殺去聲也蜡之祭仁之至義之盡也黃衣黃冠而祭息田夫也野夫黃冠黃冠草服也大羅氏天子之掌鳥獸者也諸侯貢屬焉草笠而至尊野服也羅氏致鹿與女而詔客告也以戒諸侯曰好田好女者亡其國天子樹瓜華不斂藏之種也八蜡以記四方四方年不順成八蜡不通以謹民財也順成之方其蜡乃通以移民也既蜡而收民息已故既蜡君子不興功

此節記蜡祭之禮天子大蜡對諸侯大夫而言凡王事曰大伊耆氏古者天子之號或曰卽堯也或曰神

農氏索斂藏意藏則索萬物相見則不必索冬藏合
聚故搜索而祭也人與萬物同生人資物養凡有功
者皆索其神祭之而稼穡爲先故主禱一曰先嗇嗇
穡同神農也爲八神之主二曰司嗇古后稷之官祭
配祭也三曰百種百穀種子之神四曰農古田峻巡
行阡陌躬勸農者也五曰郵表畷野亭爲郵植木爲
表田畔爲畷于疆界連綴處建亭立表田峻所息以
省農者也六曰禽獸卽下文貓虎除苗害者也有德
不忘仁也念及禽獸仁之至也有功必報義也報及
禽獸義之盡也迎迎尸也七曰坊隄防澇則障水旱

則蓄水者也。八曰水庸，溝洫也。滂能洩，灌能通，皆有功于穡事者也。土反其宅，四語祝辭。昆蟲至冬伏，故曰毋作草木。至冬落，故曰歸澤。昆蟲毋作，則螟螣不爲災。草木歸澤，則荆棘不害田。又祈禱之辭。皮弁素服，天子諸侯蜡祭之服。歲終歸藏，故曰送終。以葛爲帶，以榛爲杖，帶不用麻，杖不用竹，非喪若喪，故曰喪殺。蓋物來資其養，歸則送其終，所以爲仁至義盡也。黃衣冠，民間蜡祭之服。黃，土色。百昌生于土，反于土。冬，土反宅。萬物復命，故蜡以息田夫也。野夫戴草笠，其色黃，以象土，釋所以黃冠蜡祭之義。周官羅氏掌

羅鳥。蜡則作羅襦。謂作網取禽。卽昆蟲蟄然後火田之意。諸侯于蜡時貢鳥獸。其使者戴草笠而至。尊尚野服也。羅氏于使者歸。致鹿與女。詔客使歸告其君。致鹿以戒好田。致女以戒好色。辭曰。好田獵女色。必亡其國。蓋因歲終休息。致荒樂之戒。卽詩無已大康之意。瓜華猶言瓜果。種瓜果聊供一時之用。非可久藏之種。因歲終蓄藏。戒諸侯勿封殖聚斂也。皆羅人之辭。君無荒樂。則不勞民力。無聚斂。則不傷民財。皆念農事艱難。不忘小民之依。此先王制蜡之本義。自此以上。皆言天子之大蜡。八蜡以記四方。又言侯國

之蜡。四方謂四方之國。記謂記其豐歉也不順。謂風雨不時不成。謂五穀不熟。通猶同也不通不與順成之方同祭。所以謹民之財。不以逸樂妨衣食。與民同憂也。順成之方。其蜡乃通。移弛同。休息也。百日之蜡。一日之澤。與民同樂也。蜡以紀天時。同民情。非專爲荒樂耳。旣蜡而收聚民乃休息。不興作以役民。念終歲勤動。遺一日之安也。古人制蜡之義如此。後世正朔建子建丑。又建亥。而蜡不以時。與古人息農之義背矣。

按蜡與腊通。腊昔也。物昔死今乾曰腊。故夫子曰。白

日之蜡言久勞憊瘁也。百物冬禱。故歲終之祭曰蜡。秦以後曰臘。臘亦乾久之名。八神。本文分曉。鄭去百種。增昆蟲。若是則田鼠田豕亦昆蟲也。豈與貓虎共祭。害苗者莫如蟲。詩云。田祖有神。秉畀炎火。豈可配先嗇。與百種同報乎。祭皆有尸。皆象以人。如詩儋靈星之尸。象鸞以絲衣。戴弁者爲之是也。蘇軾謂迎貓爲貓尸。迎虎爲虎尸。非也。不然坊庸以何爲尸乎。周禮司服云。王祭羣小祀。用玄冕服。今云皮弁素服。是王祭亦有時用弁。雜記謂惟大夫弁而祭于已。不盡然矣。皮弁素衣。天子諸侯大蜡之服。黃衣黃冠。民間

蜡之服鄭謂皮弁祭大神黃冠祭先祖五祀亦未然也虞夏以前皆以寅爲正故蜡宜丑月是謂送終息老休農商正建丑則子月蜡周正建子則亥月蜡秦正建亥則戌月當蜡而九月農未畢十月土工方始春秋傳云水昏正而栽日至而畢土功雖欲息民得乎或謂蜡皆用丑月非也商周郊廟禘嘗山川社稷百神之祀皆用四時之正惟蜡不然此乃三正所以異也秦正月建亥臘先祖五祀者以戌月爲歲終太早故用正月耳皆非古也

恆豆之菹水草之和氣也其醢陸產之物也加豆陸產

也其醴水物也。蓬豆之薦水土之品也。不敢用常絜味而貴多品。所以交於神明之義也。非食味之道也。先王之薦可食也而不可嗜也。卷案冕路車可陳也而不可好也。武壯而不可樂也。宗廟之威而不可安也。宗廟之器可用也而不可便其利也。所以交於神明者不可同於所安樂之義也。酒醴之美玄酒明水之尚貴五味之本也。黼黻文繡之美疏布之尚及女功之始也。莞簞之安而蒲越橐鞶甲之尚明之也大羹不和貴其質也大圭不琢美其質也。丹漆雕幾之美素車之乘尊其樸也。貴其質而已矣。所以交於神明者不可同於所安褻之

甚也如是而后宜鼎俎奇而邊豆偶陰陽之義也黃目鬱氣之上尊也黃者中也目者氣之清明者也言酌於中而清明於外也祭天掃地而祭焉於其質而已矣醯醢之美而煎鹽之尚貴天產也割刀之用而鸞刀之貴貴其義也聲和而後斷也

恆豆常設之豆祭初陳設之正豆也祭末醑尸所薦爲加豆祭饗之豆皆有恆有加豆以盛菹醢凡菜淹漬之曰菹素味也剉肉爲醢醬曰醢肉味也菹與醢二者兼設詳見周禮天官醢人之職恆豆水草蒲芹之屬恆豆陸產鹿豕之屬加豆陸產葵筍之屬加豆

水物羸魚之屬蓋菜味水少陸多肉味陸少水多正
貴常加貴異也武壯謂舞者所執干戚之類玄酒水
也明水明潔之水水淡爲五味之本女功先粗後精
故疏布爲女功之始蒲越橐鞬明之者人尚安神明
不以安也雕幾雕刻細文也黃目黃彝也酒尊之屬
刻爲獸形而以黃金飾其目以盛鬱鬯之酒有芬芳
之氣故爲鬱氣之上尊也黃者中也三句申明黃目
之義言鬯酒注于中而清明之氣達于外猶祭者精
誠中積而禮文外著欲人顧名思義謹禮也前鹽鹽
以煎鍊成也周禮鹽人掌祭祀共苦鹽散鹽鹽用煎

而質味天成故曰天產鸞刀有鈴割之成聲和而能斷所謂利能和金能悅莊生謂徐則甘而不固疾則苦而不入者也

按水草之交曰菹孟子云驅蛇龍而放之菹與沮同詩云彼汾沮洳浸漬曰沮洳故豆菹取水草之和爲正周禮菹用蒲芹水草也草生水濱水土氣和故恆菹用之然詩云疆場有瓠是剥是菹瓜瓠葱韭葵藿莧陸之屬生于陸者皆可菹而海錯江鮮水物爲多皆非常膳故爲加周禮豆醢恆與加雜用水陸與記不合說者執周禮解記甚牽強而記言爲長

冠義始冠黻之緇布之冠也。大古冠布。齊齊則緇之其
緇也。孔子曰：吾未之聞也。冠而敝之可也，適于冠於作
以著代也。黻於客位，加有成也。三加彌尊，喻其志也。冠
而字之，敬其名也。委貌，周道也。章甫，殷道也。毋牟追堆
夏后氏之道也。周弁，殷舄，夏收，三王共皮弁素積，無大
夫冠禮而有其昏禮。古者五十而后爵，何大夫冠禮之
有。諸侯之有冠禮，夏之末造也。天子之元子，士也。天下
無生而貴者也。繼世以立，諸侯象賢也。以官爵人，德之
殺也。死而謚，今也。古者生無爵，死無謚，禮之所尊，尊其
義也。失其義，陳其數，祝史之事也。故其數可陳也，其義

難知也。知其義而敬守之。天子之所以治天下也。

此節記冠禮之義。冠義者。題其目也。冠禮三加。初加緇布冠。是上古齊居之冠。以緇色布爲之。而無綏綏冠纓之餘而垂者。上古白布冠。質任自然。齋則緇之。鬼神尚幽也。無飾。故皆無綏綏。自後世始。故孔子謂未聞布冠。惟始一用之。不再製。故曰冠而敝之可也。適子承父冠于阼階。明將代父爲主也。酒飲冠者曰醮。客位在戶。牖間南面。加有成。謂冠則成人。故加禮也。三加。謂始加緇布冠。次皮弁。次爵弁。彌尊。謂冠服之等。祝醮之辭。以漸隆也。所望益尊。其志益大。喻曉

也。此冠適于之禮。庶于冠于房外。遂醮焉。冠而字。謂
既冠而賓字之。重成人。不斥其名。適庶同也。委貌。章
甫。毋追。三者皆緇布冠。而三代異名。始加之冠也。委
安也。委貌。安正容貌也。章甫。表明丈夫也。追。作堆。毋
追。短小貌。弁。昇收。三者皆爵弁。以玄纁爲之。三代異
制。三加之冠也。弁。桀然高大貌。殷曰冔。冔之言恤。覆
也。夏曰收。收髮也。皮弁。弁以皮爲之。再加之冠也。古
者衣禽獸之皮。後世以爲冠。不忘古也。其裳用素。積
貴質也。積折也。儀禮但有士冠。大夫以上無冠禮。凡
冠。年十五以上。古人五十始爲大夫。未有五十始冠。

者所以無大夫冠禮也。冠不再而昏有再者，大夫昏禮則有之。大夫無冠禮，諸侯可知。諸侯有冠禮，自夏末始。傳賢風遠，家國天下以世繼，故諸侯有未冠繼立者，非古也。玉藻謂玄冠朱組纓，天子之冠緇布冠，纁綌，諸侯之冠是也。若夏以前，豈惟諸侯無冠禮？雖天子亦無之。天子之長子未繼世，亦士也。人未有始生，卽貴爲天子諸侯者，須有德，然後爵之。天子之元子非生，卽宜王也。亦爲士脩德，德成後繼，所以幼而冠。亦士耳。諸侯年長有德，象先世之賢，乃命以國，方其爲世子，冠亦士也。故先王以官爵人，因德大小爲

降殺生以德命爵死以德命諡生無爵而死有諡皆私意也。今之失也。非古禮也。古非成人有德不得爵爲大夫。安得有大夫冠禮乎。可知禮皆有義。後人以尊先王之禮。惟義耳。尊猶貴也。襲其迹。失其義而陳其數。祝史之事。執其數。不過祝史通其義。可治天下。故君子義爲質。禮以行之也。

按冠元服也。象天而色玄。用繒帛。謂之爵弁。玄鳥之色也。三王用皮弁。示不忘古耳。雖用皮而色亦玄。鄭謂用白鹿皮。鹿馬有白者。去毛則凡皮皆白。何獨鹿白冠近凶。豈可爲元服。服不言衣。而獨舉積積素衣。

不素可知。古人行禮吉服。衣無不玄。緇者。若以白冠。白衣裳。臨朝視朔。不近于凶喪乎。卽殷人尚素。亦未有君臣無故舉朝縞素者矣。禮始于士。自大夫以上。其義可知。非天子諸侯禮遂亡也。諸侯別有冠禮。大夫別有昏禮。亦不過升其等。增其數。豈能達三加六禮。別創乎。玉藻云。始冠。緇布冠。自諸侯下。達玄冠。朱組。纓天子之冠。緇布冠。纁綌。諸侯之冠。大戴公符篇云。諸侯冠禮。四加。玄冕。左傳云。公冠用裸享之禮。行之。金石之樂。節之所損益。可知也。禮所尊尊。其義此言爲四十九篇之要。于郊特牲載之者。見禮本于天。

而繫以義者明禮所由起也故曰君子義以爲質禮以行之如鄭玄諸人穿鑿委瑣祇同祝史而說者以陳數爲致知格物之學非聖人約禮之意聖人貴禮百世相因因者義之經損益者數之陳回也如愚所以復禮魯參不貴邊豆故唯一貫尊其義之謂也

天地合而萬物興焉夫昏禮萬世之始也取於異姓所以附遠厚別也幣必誠辭無不腆告之以直信信事人也信婦德也壹與之齊終身不改故夫死不嫁男子親迎男先於女剛柔之義也天先乎地君先乎臣其義一也執摯以相見敬章別也男女有別然後父子親父子

親然後義生。義生然後禮作。禮作然後萬物安。無別無義。禽獸之道也。壻親御授綬。親之也。親之也者。親之也。敬而親之。先王之所以得天下也。出乎大門而先。男帥女。女從男。夫婦之義由此始也。婦人從人者也。幼從父兄。嫁從夫。夫死從子。夫也者。夫也者。以知帥人者也。玄冕齊戒。鬼神陰陽也。將以爲社稷主。爲先祖後。而可以不致敬乎。共牢而食。同尊卑也。故婦人無爵。從夫之爵。坐以夫之齒。器用陶匏。尚禮然也。三王作牢。用陶匏。厥明。婦盥饋舅姑。卒食。婦餽餘。私之也。舅姑降自西階。婦降自阼階。授之室也。昏禮不用樂。幽陰之義也。樂

陽氣也。昏禮不賀人之序也。

此節記昏禮之義。有夫婦然後有父子。繼世相傳。故曰萬世之始。附遠附于疏遠者。聯姻于異姓也。幣謂納幣。其辭不稱不腆。凡稱不腆者。主人之謙辭。昏禮納幣以直相告。示信也。信者。事人之道。婦人之德也。齊猶匹也。不改節不再嫁。所以爲信也。男親迎而後女行。陽倡陰隨。剛下而柔上。易所謂咸也。執摯相見。謂壻往必奠鴈。敬不敢褻。所以明別也。男女有別。無淫辟之私。則無呂易嬴牛易馬之事。而一本之誼篤。故曰父子親。父子親則慈孝立。而百行始。義生禮作。

而萬物安壻。旣奠薦出婦從升車。壻親爲御授婦以綏。不使僕人代示躬親也。所以親愛之也。旣章別以敬之。又御輪以親之。先王所以得天下之道。始于閨門之內。能敬以親而已。出門而先壻車在前也。女從男。婦車在後也。夫也者。丈夫也。丈夫以知帥人者也。親迎而玄冕而齊戒者。以事鬼神陰陽之道行之也。鬼者陰之靈。神者陽之靈。故曰鬼神陰陽也。爲社稷主。內主也。爲先祖後育嗣也。社稷先祖皆鬼神也。牢。牲俎也。共牢而食。謂婦始至入室。壻與同席三飯也。夫尊則婦亦尊。夫卑則婦亦卑。所爲同牢之義也。婦

無爵以夫爵爲爵其坐以夫名分爲序所以爲同尊卑也尊用陶爵用匏二者無文自然之質上古之禮也尚上同三王作爲同牢之禮器用陶匏示不忘古重人道之始也盥饋新婦盥潔饋食舅姑也食餘曰餽餽舅姑之餘舅姑以將代已私親之也饗新婦一獻畢舅姑先降自西階婦降自阼階示將授之室使爲內主也樂音宣暢陽之義也昏陰禮故不用樂子云取婦之家三日不舉樂思嗣親也人之序人道相承之次序所謂嗣親也孝子思嗣親故不賀賀相慶也

有虞氏之祭也。尚用氣。血腥爛。祭用氣也。殷人尚聲。臭味未成。滌蕩其聲。樂三闋。然後出迎牲。聲音之號。所以詔告於天地之間也。周人尚臭。灌用鬯臭。鬱合鬯臭。陰達於淵泉。灌以圭璋。用玉氣也。既灌。然後迎牲。致陰氣也。蕭合黍稷臭。陽達於牆屋。故既奠。然後烝。入蕭合羶薌。凡祭慎諸此。氣歸于天。形鬼歸于地。故祭求諸陰陽之義也。殷人先求諸陽。周人先求諸陰。詔祝於室。坐尸於堂。用牲於庭。升首於室。直祭。祝于主。索祭。祝于祊。不知神之所在。於彼乎。於此乎。或諸遠人乎。祭于祊。尚曰。求諸遠者與。

此與下節皆雜舉祭祀之義有虞氏之祭在誠不在物尚用氣以氣爲尚也陰陽二氣無聲無臭最爲微妙初以血詔神于室次薦腥肉次薦燂肉皆于堂三者皆不熟所謂用其氣也凡聲屬陽凡臭屬陰聲通兩間臭達上下商人尚聲先求諸陽也鬯未灌牲未殺臭味未成也滌蕩其聲大作樂也三闋樂三終也鬼神在天地之間以聲音詔告之求神于陰陽之義也周人尚臭先求諸陰也鬯酒之香者臭香氣灌瀉于地也鬯香草搗鬱合鬯酒使臭氣陰通于地下其灌也用圭璋爲瓚柄瓚有勺可盛酒圭璋美玉也致

陰氣瀝地求神于陰也。蕭蒿也。合黍稷謂以黍稷合膏脂焚以蕭也。火與氣爲陽。使臭氣達牆屋求神于陽也。既奠謂堂事畢。尸將入室薦熟饋食。祝先酌酒奠于室。而後燔蕭。合脾臂之羶與黍稷之薌。薌香同卽禮器所謂制祭也。求諸陽索諸寃也。求諸陰索諸鬼也。鬼至而後羗歸。寃至而後鬼靈。故祭求諸陰陽也。恒諸此通指三代所尚氣聲臭之禮而言。殷人先求諸陽。先聲後臭也。周人先求諸陰。先灌後燔也。詔祝於室以下數事。儀禮無之。先儒以爲天子諸侯之禮也。於室謂未朝踐之先。尸在室迎牲告殺祝皆詔。

於室也。坐尸於堂。謂延尸出堂朝踐薦腥爛也。用牲於庭。謂殺牲庭下也。詩云執其鸞刀以啓其毛。卽此時也。升首於室。謂取牲首薦于室中直當也。以牲首當神前祝者以辭告于神主也。索祭求神也。神無形故求索之。祊廟門也。祭日索神于門。明日繹又送神于門。於彼於此通室堂庭主祊而言神之無定在也。遠詣人疑其不在廟中也。祭于祊庶幾曰求諸遠之意也。尚庶幾也。

按古祭儀不可覩而諸篇本末俱見儀禮三篇節文尤詳周禮多名法漢唐以來註疏參伍解釋大畧已

具不必盡合而變通存平時與人如朝踐之名見于周禮而儀禮無之祊祭堂事之類見于詩與記而儀禮無之犬抵非一代一王之制而其文非傳自一時一人之手世遠篇雜欲一一校勘無遺難矣苟隨時損益皆可以行禮故曰百世可知學者多聞以聚之其所不知闕如耳

祊之爲言惊

諒也

所

祈

之爲言敬也富也者福也首也

者直也相

去聲

饗之也嘏長也大也尸陳也毛血告幽全

之物也告幽全之物者貴純之道也血祭盛氣也祭肺

肝心貴氣主也祭黍稷加肺祭齊

去聲

加明水報陰也取

辟

律管條

燔燎升首報陽也明水沉

祝

齊

聲去

貴新也凡

沉新之也其謂之明水也由主人之潔著此水也君再拜稽首肉袒親割敬之至也敬之至也服也拜服也稽首服之甚也肉袒服之盡也祭稱孝孫孝子以其義稱也稱曾孫某謂國家也祭祀之相聲去主人自致其敬盡其嘉而無與讓也腥肆爛臠聲去祭豈知神之所饗也主人自盡其敬而已矣舉犖角詔妥尸古者尸無事則立有事而后坐也尸神象也祝將命也縮酌用茅明酌也醑酒沉于清汁獻沉于醑酒猶明清與醑酒于舊澤之酒也祭有所焉有報焉有由辟焉齊之玄也以陰幽思

也故君子三日齋必見其所祭者

掠掠也求索之意祭有所俎尸食餘及于上主人敬尸正俎外專設此也嘏辭有富卽少牢宜稼于田之類詩云何神不富富之言福福備也首升牲首于室也牲首在前與神坐相直以表其專直也相謂祝與佐食輩贊相尸欲其神饗也嘏福辭使主人長久盛大卽萬壽百祥之意祭有神主又爲尸象死者陳列之也殺牲以毛血告神血在內告幽毛在外告全所以告幽全者貴表裏之純也無血則非殺毛裸則不純血由氣化氣盛則生氣衰則死祭以血明氣之盛

爲生物也。月令夏祭肺。秋祭肝。夏季祭心。三物皆生氣之主。居前爲陽。屬氣也。或曰周祭肺。殷祭肝。夏祭心。三代之禮也。黍稷地產屬陰。尸祭豆間必取黍稷加于肺上。尊陳五齊。各加明水。水陰物。酒求神于陰。皆以報陰也。腍腎腸間脂也。將行室事。先取腍腎合蕭與黍稷燔之。升牲首于室。火與氣牲首皆陽。以通神于陽而報之也。明水清潔之水。浼以水和之。齊五齊。見周禮。皆酒之厚而濁者。和以水則新矣。潔著主人潔淨著明也。凡宗廟之祭。主君必再拜稽首。肉袒割牲敬之至也。敬之至者。服順祖考也。拜必俯伏所

爲服也。稽首至地服之甚也。肉袒去飾服之竭盡無餘也。子孫自稱孝以子孫義所當盡爲稱也。稱曾孫某適宗主祭有國家者之謂也。凡稱辭皆相禮者稱之。稱孝稱曾不謙讓者。主人自致子孫之敬盡禮儀之善相與其致盡不與其讓也。生肉曰腥陳牲曰肆。燔以湯滌之未熟也。臠熟之爲殽也。犖角皆爵名。舉祝舉也。詔告也。安尸尸入室卽席祝告主人拜以安之。尸遂坐而卒祭此周禮也。古禮則尸立卒祭有飲食之事而後坐也。祝將命傳神與主人之命縮涕也。齊濁故涕去其滓用茅以茅草苴而涕之滓去則清。

故曰明的醖醖醖也夏曰醖尊中之醖濁于醖故曰醖
酒醖酒卽明的清謂水也以水沉和之貴其新也汁
獻謂搗鬱汁和醖酒以裸獻也周禮春官司尊彝職
云鬱齊獻酌卽汁獻也舊澤陳酒釀厚如膏澤也以
汁和醖酒猶今人以明水和于醖飲舊酒也鬱鬯不
和則汁濁不可以灌舊酒不和則味濃不可以飲祈
謂求福報謂酬功由用也辟除也用祭除災所謂禳
也三者皆祭之例齊之玄凡齋衣尚玄也三日齋見
所祭者取玄通之義

按周禮酒有五齊三酒齊者汁和滓之名五齊二曰

醴齊要之皆醴也。五以先後異名耳。酒久也。去滓存
汁。卽今之酒。三以新舊異名耳。禮貴新賤舊。貴澹賤
濃。故醴重于酒。而醴酒又各以新淡爲重。故水稱玄
酒。象太初也。然鬱鬯之酒。釀以秬黍。和以香草。芳芬
濃郁。又爲初裸之上尊。何也。鬱鬯唯宗廟用之。祀先
盡禮祀天。貴自然。而解者謂涕鬱鬯用五齊。涕五齊
用三酒。本文未見此意。鄭據周禮以明酌爲事酒。醲
酒爲盎齊。清爲清酒。汁獻爲汁莎。舊澤爲舊醕。牽強
穿鑿。無謂也。

禮記通解卷九終